

Wednesday, January 14, 2026

Time - 2:30pm - 2:35pm

## AKASHVANI AIZAWL

### REGIONAL NEWS UNIT

#### STATE LEVEL MOCK EXERCISE

Vawiin khan Disaster Management & Rehabilitation Commissioner & Secretary Pu Udit Prakash Rai chuan a pisaah naktuka Mizoram puma State Level Mock Exercise on Earthquake Disaster neih tur chungchang a sawifiah a, mock exercise a nih angin a tak taka thil thleng thei entirna tur a nih avangin chia lo turin Mizoram mipui a chah.

Pu Udit Prakash Rai chuan, Mizoram chu lirnghing nasa tak thlen theihna Seismic Zone 5 atangin lirnghing rapthlak tak thlen theihna, fimkhur leh inpuahchah ngai Seismic Zone 6 ah dah thar a nih thu a sawi a; sorkar mai ni lo mimal, chungkua leh khawtlang pawh lirnghing na tak mai lo thleng palh thei laka inpuahchah a ngaih thu a sawi.

Sorkar laipua National Disaster Management Authority leh Mizoram a State Disaster Management Authority leh District tina District Disaster Management Authority te chuan State Level Mock Exercise on Earthquake Disaster hi naktukah District tin khawpuia hmun thlan bikah te neih a nih dawn thu DMR hotute chuan an sawi a; hei hi nasa taka Mizoram rawn sawi nging a, chhiatna rawn thlen thei chungchanga fimkhur tulzia leh inpuahchah dan tur mipui inzirtir na tur leh, chhiatna thleng thei hmachhawn tura inpuahchah nan leh, chhiatna lo thlen palha hmachhawn dan thiam na tur bakah chhiatna kaihnawh department hrang hrang ten an hmanrua theuh an hman thiam leh thiam loh en nan leh an tih tur theuhte an chian leh zual nan te, midangte nen a thawhho that leh zual nan te hmasawn an ngaihna laite hriat chhuah a nih theih na atana tih a ni, an ti bawk.

#### Byte : Udit Prakash Rai

DMR hotute chuan mock drill-ah chuan chawhma dar 10-ah DC ten siren an ti ri dawn a, chawhma lama drill chu chhun dar 12 vel thleng a nih dawn thu leh tlai lamah district tina hmun thlan bikah dar 4-6 thleng neih leh an ni dawn an ti a. Lirnghing palh thei hre chung a chet lak dan enchhinna a ni tih hriaa chia lo turin mipui an ngen a, thudik lo vawrh darh lo tur leh Mizo mipui zawng zawng tana tangkai leh tha tur a nih avangin mipui hriathiamna, tawiawmna leh thawhpua an ngen nghal bawk a ni.



#### ADCC

Aizawl District Congress Committee (ADCC) hruaitute chuan vawiin khan Aizawl Press Club-ah thuthar thehdarhtute kawmin, BJP sorkarin MGNREGA thlak nana G-RAM-G a kalpui chu tha lo an tih thu leh angai anga kalpui leh an duh thu an sawi.

ADCC President Pu Lalhmingthanga Pachuau chuan MGNREGA hi kum 2006 a hman tan anih atangin mi vbc 180 chuang inhlawhna siam a ni tawh a, chungkaw vbc 4 point 6 in an chhawr tawh a, kawng leh tuizem vbc 10 chuang siam a ni tawh an ti a, kum 20 chung India rama thingtlang mite inngahna MGNREGA tihtawp a nita chu pawh an tih thu a sawi.

MGNREGA chu CAG Audit telin zirchianna vawi 200 chuang paltlang tawh a nih thu leh project hlawhtling leh nghawng nei tha ber zinga mi a ni tih hmuhchhuah a nih thu Pu Lalhmingthanga chuan a sawi a, heivang hian Modi-a sorkar hian tihtawp an duh hle a ni tih an thiltih hian a ti lang a ni, a ti bawk.

**(Byte - Pu Lalhmingthanga, ADCC President)**

Pu Lalhmingthanga chuan Modi sorkar chuan dan anga inhlawhna Central sorkarin a pek chu ti tawpin kuthnathawktute tana inngahna tha tak chu a tihtawp sak ta tih sawiin, MGNREGA a tawp chuan hnathawh tur nei lo an pung dawn an ti a, mipuite chu minimum wages hlawh pha loa chhawr an ni dawn tih sawiin khawsak harsat avanga khawpuia pmlut a titam hle dawn tih sawiin Panchayat leh VC ten thuneihna an hloh dawn niin a sawi.

Congress hian MGNREGA Bachao Sangram tia vuahin thil phut pali an nei a, heng zingah hian Langtlang taka kalpui leh MGNREGA thlak lova a ngai anga kalpui leh Constitution in a pek anga inhlawh theihna chanvo peklet bakah Ram pumah minimum wages atan Rs 400 hman te a ni.



## **PM VISHWAKARMA SCHEME AWARENESS PROGRAMME**

Vawiin khan DC Pisapui Hall-ah PM Vishwakarma Scheme Awareness Programme huaihawt niin scheme kaltlanga hamthatna awm thei hrang hrang sawi a ni.

He hun hmanpuitu Aizawl DC Pu Lalhriatpuia chuan tualchhung kut themthiamte tan PM Vishwakarma Scheme hnuaiiah hian kawng hrang hranga hmasawna a awm tih sawiin scheme kaltlanga eizawna nghet, mahni mai nilo chhungkua leh tu chhuan thlenga intundin nan an hman theihna tur a nih avangin tualchhung kut themthiam te chu Scheme hmang tangkai turin a sawm a ni.

Vawiin hun hmanah hian artisans thahnem tak telin, PM Vishwakarma Scheme chungchang, Digital Marketing, financial/digital literacy, Financial Literacy, Advertising and Packaging Promotion, QR Code generation leh topic dang hrang hrang te zirho a ni.

